

DISSERTATIO INAUGURALIS MEDICA,  
DE

GENUINO ET  
SIMPLICISSIMO DO-  
LORIS PODAGRICI REMEDIO,

QVAM

RECTORE MAGNIFICENTISSIMO,  
SERENISSIMO PRINCIPE AC DOMINO,

DN. FRIDERICO WILHELMO,  
ELECTORATUS BRANDENB. HEREDE,  
ET RELIQUA,

IN ILLUSTRIS FRIDERICIANA  
GRATIOSO FACULTATIS MEDICÆ CONSENSU,  
PRÆSIDE

DN. FRIDERICO HOFFMANNO,  
MED. D. PHIL. NAT. P. P. O. MED. ELECT. AULICO  
COLLEG. MEDICI h. t. DECANO,

DN. PATRONO, ET PROMOTORE ÆTATEM COLENDO,

*P R O L I C E N T I A*

Summos in Medicina Honores, insignia ac Privilegia Do-  
ctoralia rite consequendi,


*A. diem VI. Nov. M. DC. XCVII.*

*H. L. Q. C.*

Publicæ Eruditorum censuræ submittit

STEPHANUS KIRALY,

Debrecino Ungarus.







DISSERTATIO INAUGURALIS MEDICA,  
De  
**GENUINO ET SIMPLICISSI-  
MO DOLORIS PODAGRICI RE-  
MEDIO.**

§. I.



**N**ihil naturæ humanæ  
tam abominabile atque ærumno-  
sum, nihil tam difficile quam diu-  
turnos & diros sustinere dolores,  
quorum sæpius tanta vis est, ut  
cum corpore mentem in functio-  
nibus suis disturbent, ipsique non

minimam intendant pernitiem. Ex sævissimis autem  
primas videtur tenere ille qui articulos torquet, pro-  
pter quem memoriæ mandatū multos fuisse qui præ  
intolerantia filum vitæ sibi præscinderunt. Quid autem  
vulgarius, quid Princeps hujus mundi, divites & præci-  
puos viros magis affligere & vexare solet, quam dicti  
doloris sævitia. Quanto conatu atque industria pro mo-  
lestissimo hoc hospite avertendo quæsitæ & excogitata



hactenus sunt remedia. Tot ferme podagricorum proflant arcana atque pharmaca, quot sunt qui ex hoc morbo laborant individua, ut ingens subrepat tædium tantam remediorum sylvam adversus unum morbum recensere. Equidem est Chemiatorum contentio in hoc probanda, quod variis auxiliis ægrotantium fastidia sublevare fuerint annisi; ast nisi verum dissimulare velimus, neutiquam respondent omnia huc usque in medium producta expectationi, sed pleraque inflant spem hominum postea autem destituunt, adeo ut ægerrime sanescant illi quorum artus semel occupavit dictus morbus. Cum autem mecum paulo exquisitus expenderem genesin & nativitatem huius affectus, & quare tam pertinaciter remediorum vim eludat atque contemnat, deprehendi spem sanationis, modo non penitus sit consummata minime esse abjiciendam, sed restare adhuc probatissimum idque simplicissimum remedium, & ob id a Medicorum filiis ipsisque ægrotantibus, quorum ingenio minus arridet, repudiatum parvique æstimatum. Id autem ut verbo me expediam & statim in limine curiosorum expleam desiderium, Physico-morale est, & temperantia vitæque sobrietas nuncupatur. Hæc mea sententia optima & tutissima medicatrix & præservatrix, huius affectus est, hæc asperitatem huius morbi complurium exemplo non modo lenit & mitigat, verum & vincit planeque avertit, nisi res omnis ratione naturæ ægrotantis & vehementiæ morbi sit conclamata. Placet autem paulo fusius hæc omnia exquisere & in præsentia paulo accuratius determinare, in quo natura atque ingenium versetur huius morbi; quinam ortus ac causæ ejus sint & a quibus foveatur ac susten-



stentetur; & quo pacto commendata hæc medicina proficere & omne fere punctum absolvere queat. Deus T. O. M. ex alto assistat nostris conatibus.

§. II.

Ut autem scopum nostrum rite attingamus, & assertionis nostræ veritas eo clarius eniteat res poscere videtur paulo distinctius exponere, cujus naturæ indolis ac temperamenti potissimum sint illi, & qua vitæ ratione utantur, quos dolor exercet podagricus. Primum autem huic morbo obnoxii sunt maxime qui tenerioris complexionis, habitus corporis mollioris ac spongiosioris sunt, juvenes, viri, succi pleni, temperamenti sanguinei, vel sanguineo pituitoli, hoc est qui copiosum & tenuem sanguinem in parvis at innumeris vasculis fovant. Ut plurimum solent esse ingenio hilares & acuti, veneris appetentes & affectibus dediti, qui dulcibus delectantur nec laboribus gravioribus asveti. Unde volupe viventium morbus antiquitus etiam putatus hic morborum *ρυγαννυκός* est, diætæque plerumque vitiosæ proles, hinc plebei rustici & pauperes & qui duro labore membra exercent & victu simplici utuntur raro vel nunquam cum molestissimo hoc morbo conflantur. Porro fæminæ quia a luxu & libidine magis sunt alienæ, nec diætâ adeo ut viri abutuntur, a podagra sunt immunes ipso Hipp. teste lib. 6. aph. 29. nisi luxu etiam diffluant & ex imminuta menstrua purgatione sentina superfluatorum & corruptorum humorum ansam huic morbo præbeat. Eunuchi & pueri eodem Hipp. assentiente l. 6. Aph. 28. 30. ex podagra non laborant, quoniam extra veneris usum sunt, sed succi nativi plena



omnia eorum vasa sunt. Dantur tamen exempla licet pauca ubi etiam pueri podagra afflicti fuerunt, ubi nimirum a Parentum semine illa nata fuit, & maxime cum lue venerea contaminati fuere. Et Müllerus in *oper. pag. 648.* refert, se nobilem curasse juvenem qui ab ineunte ætate sæpius correptus fuit podagra, quoniam Parens ejus in ipso paroxylmo eum genuerat; ex podagricis enim juxta Galenum & Hippocratem ipsaque experientia teste fiunt podagrici. Quare scite dixit Plutarchus: expedire ut statim podagricorum filii curentur, ne fiant podagrici. Ulterius podagrici solent esse hypochondriaci nephritici & qui ex ventriculi imbecillitate viri-umque debilitate laborant; unde quæcunque naturæ vi-res frangere & debilitare solent podagræ generationi ve-lificantur.

### §. III.

Jam autem quod attinet ipsius podagrici doloris ge-nesin, non nisi ex fractis naturæ viribus, debilitato visce-rum atque articulorum tono, imminutaque sanguinis chylique spirituaſcentia originem suam trahit. Nihil au-tem magis labefactare robur partium solidarum, nec non æquabilem temperiem ac motum spirituum atque hu-morum destruere aptum est quam desidra, generosi vini potatio, veneris abusus, iracundia & quæ sunt generis alia. Quomodo autem hæc noceant & corpori infen-sa sint, & podagricum malum exſuscitent, paucis sic complecti placet. Podagra spasmus summe dolorifi-cus est excitatus in membranis ac ligamentis nerveo ten-dinosus, qui articulos firmant atque in musculorum ten-dinibus qui juxta juncturas abundant. Subjectum dolo-ris



ris est spiritus quo perfusæ sunt ipsæ membranæ, quique ex sanguine vitali & nervorum fluido invicem commixto originem suam nanciscitur. Hic a Deo sic congenita efficacia sua motum irregularem a vitio fluidi ipsi impressum persentit. Quapropter quo major spirituum copia, quo major ipsorum rigor atque actuatio, & nocentis humoris vis atque impetus gravior, eo impetuosior spirituum motus graviorque sensatio atque affectio oboritur. Et inde facile constat ratio, quare juvenes & qui robore ac vigore spirituum pollent acerbiores ac duriores paroxysmos, breviores tamen ipsis frigidis imbecillibus ac senibus experiantur, qui mitiores aut diuturniores patiuntur. Unde perpulchre scribit *Pechlinus Obs.* 25. nonnullos esse arthriticos qui per multas septimanas & sæpe per annum podagra detinentur, cum nulla alia symptomata infestiora habent quam membrorum ἀνικητέαν appetitum prostratum, sitim inexhaustam, & noctes diesque insomnes, cessante scilicet paulatim spirituum vigore.

#### §. IV.

Cum itaque spiritus a causa lancinante & irritante in impetuosum atque discursivum in angustissimis membranarum tubulis motum concitantur, molestissima tensio, distractio & continui solutio exsurgit, sub qua tensione constrictio & coangustatio vicinarum partium fit. Quare invadente dolore pori cutis angustantur, influxus sanguinis & refluxus debitus impeditur, sudor ac transpiratio nunc cohibetur nunc augetur, membrum rigore ac rubore concutitur, venæ disparent, & valde sensibilis in parte affecta distensio & distractio percipitur concomitante æstu, rubore & subsequente tumore

Spa-



Spasmus autem hic non tantum in afflicta parte incipit & subsistit sed ulterius serpit inque consensum trahit alias eximioque sensu præditas internas partes, quæ simili spasmō affectæ varia producant symptomata. Unde non ignota potest esse ratio, quare frequens oscitatio, flatuum descensus per femoris carnes, horripilatio per dorsum ac lumbos febriculosus pulsus, præcordiorum anxietas, somni inquietudo, torpor atque vermiculatio articulorum, in furis quasi convulsio, cibi fastidium, nausea, vomitus ubi imminet paroxysmus vel jam præsens est, ægros infestet, quæ omnia ex spasmodica constrictione & inde resultante sanguinis motione non possunt non originem suam repetere. — Adde quod podagra in alios morbos spasmodicos facile terminetur, uti in nephritidem, colicam; & hi vice versa sæpius in podagram abeant. Trincavellius *lib. 10. c. 1.* scribit se vidisse dolores in ventriculo concentratos desisse in articulares. Quinimo observatum est coli vel calculi dolores supervenientes podagræ sedasse eam. Retulit mihi Excell. Dn. Præses se annotasse in podagrico generoso supervenientem quartanam ipsa podagra discedente. Item alibi quoque observatum fuit, podagræ quartanam succedentem illam e medio sustulisse: Quod autem in febribus intermittentibus contingere solita phænomena spasmō debeantur, haud ignotum esse poterit,

§. V.

Ut autem eo melius intelligatur sub spasmodicis affectionibus ludere morbum hunc suas tragædias, attendi velim a suppresso nimis cito podagrico insultu per inviscantia poros & nociva topica, intro sic vergente materia vitiosa, pathemata subsequi, quæ non nisi a violentia



lento & molestissimo partium internarum spasma deduci possunt: Ita a podagra recedente ad interiora observata fuit colica vehementissima, urinæ suppressio, vid. *Eph. Germ. dec. II. anno VI. observ. 2. Dec. I. anno VI. obs. 208.* quæ refert asthma, Epilepsiam & colicam inde exortam. Sic quoque Welschius *dec. II. obs. med. II.* convulsionem lethalem, dyspnæam, palpitationem cordis, lipothymias cum subsequente epilepsia & apoplexia lethali notavit. Et Simon Pauli in *Quadrip. Bot.* recenset, non minus ex antiquis Aretheus lib. II. de diuturnitate c. XII. multis in hydropicum morbum, quibusdam in asthma concedere podagram immedicabili successione scribit. Postremo confirmat sententiam nostram ipsa ratio medendi pathematibus podagricorum, quæ maxime consistit in compescendis & sistendis tam per interna quam externa remedia molestissimis partium spasmis,

#### §. VI.

Exposita sic indole podagræ, quæ in spasma dolorifico, omnium ferme symptomatum parente consistit, excutiendum ulterius remanet, quænam hujus effectus causa, & in quibusnam partibus genesis mali existat. Medicorum recentiores ferme omnes in hac sententia videntur convenire, podagram morbum esse metasticum salinum a collectione salis fluidi acris stimulantis intra membranas ac ligamenta articulorum enatum. Cujus generis autem ac ingenii illud sal sit, dissentire videntur. Alii acidum, alii sal tenue corrosivum biliosum, alii austerum & stypticum principium incusant.



fant. Nos purum & sibi relictum acidum in animantium corporibus vix reperiri existimantes, tartareum illud esse afferimus, ita tamen, ut acidum quoad figuram suam scindentem spiculatam, haud secus ac in Tartaro, prædominetur. Interim tamen non negamus, pro diversitate morbi atque ægrotantium majori volatili acridine biliosa, vel etiam austeritate styptica terrea illud esse imbutum; unde etiam arthritidis variat, & volatilis vel fixus exurgit dolor magis vel minus ardore atque inflammatione infensus. Multa autem sunt, quæ peccantem materiam tartareæ indolis esse evincunt. Etenim experientia compertum est, hypochondriacos & calculosæ dispositionis ut plurimum evadere podagricos, & vice versa, ita ut affectus hi invicem sororiantur, & unus in alterum facile abeat. Serum autem in dictis morbis tartareæ falsedine imbutum esse, nemo qui gnarus rerum medicarum est, ibit inficias. Accedit, quod in consummata arthritide vel Ischiatide ligamenta juncturarum erosa a sabulo tartareo ibi subsistente reperta in sectionibus fuerint. Quin imo tophacea materia, quæ intra articulos in consummata ac frigida podagra copiose quandoque reperitur atque eximitur, manifestissime naturam tartarei salis, quod ex acido & copiosa terra conflatum sit, demonstrat. Ita *Kerckringius* sub examine chemico ex ejusmodi tophis & materia podagrica, elicuit spiritum quendam inter spiritum tartari & salis ammoniaci quodammodo medium, acidiorum nimirum illo; hoc vero mitiorem: & oleum, oleo tartari colore fæctore & consistentia in omnibus simile: nec non sal ex capite mortuo extraxit, quod ab eodem

sale



fale tartari parum abludebat, nisi quod sapore quodam extraneo infestus, ingratam quandam pariebat nauseam. vid. *spicil. anat. obs.* 28. Sic observatum quoque fuit ab auctoribus, podagricorum excrementa nimirum sputum, urinam, sudorem collecta, prævia evaporatione, præbuisse materiæ candescentis concretæ in tartari consistentiam, insignem copiam vid. *Pechlinum observ.* 25. & *Kerckringium l. c.* Notavi in viro generoso, qui subinde podagra divexari solet, sequentia: hic paroxysmum imminem præsentire solet maxime ex colore annuli, quem digito gerit ex mercurio mediante venere ac tutia confecti, qui aliquot dies ante paroxysmum & per totum morbi cursum livorem ac nigredinem contrahit, qui sponte tandem desinit pristino redeunte colore sub declinationis tempus. Id quod curiosum phænomenon mea sententia effluviis tartareo acidis per transpirationem prodeuntibus adscribendum venit. Taceo materiam in articulis podagricorum collectam, & quandoque vesicatoriorum vel aliorum remediorum usu affluentem, summe corrosivam ipso sensu teste naturam præ se ferre. Confirmare inter alia præsentiam tartarei fluidi salis in podagricis videtur nimia potatio vinorum tartareo talismodi succo scatentium, quæ podagram generare solent frequentissime; item nimia ciborum appetentia & voracitas maxime ante tempus invasionis, quæ sine dubio lymphæ acidæ abundanti in salivali & gastrico fluido debetur.

§. VII.

Congreditur autem tartareum hoc sal cum mucila-



laginoso ac pingvi, quo articuli & juncturae omnes gaudent rore ac glutine, quod secundum naturam insipidum, ossa juncturas tendinesque laevigare & obducere solet. Notabile enim est, sub membranoso ligamento, quo articuli firmari solent exstare tunicam mere glandulosam ac vesiculosam, in quam terminantur maxime in homine multae vasorum sanguiferorum ramificationes, haecque tunica, propter laxitatem suam minime intervit ossium conjunctioni, sed mucilaginem certam instar ovi albuminis, licet non semper adeo claram & limpidam secernit. Praeterea in ipso articulorum cavo exstant quoque eximia magnitudinis corpora glandulosa pinguedine obsita, quae similem mucilaginem a copiosis sanguinis vasculis ibi secernunt ad lubricandas juncturas ipsasque ab incallescencia & attritione conservandas, uti copiose pariter ac solide id deduxit celebris Anglus Clopten Havers. *in osteologia*. De hoc ipso glutine articulorum jam dudum divus Hipp. *in lib. de locis in homine*, sententia pronunciavit: *Humidum nativum articulorum ubi male valent, male habent articuli; ubi bene, & ipsi articuli*. Quotiescunque itaque materia acris tartarea in sanguine superabundans simul descendit per dictarum glandularum poros nimis laxatos ad ipsos articulos, non modo coagulum mucilaginis efficit, quod difficilius postea resolvitur vel etiam copia in gypseum corpus tandem convertitur, verum & intra subtilissimi sensus membranas incarcerata propter angustissimas vias, minus commode propellitur vel evaporat, sed detestabiles cruciatus in parte affecta suscitatur: cujus saepius tanta est subtilitas ut omnia quantumvis leniter admota tegumenta vel medicamen-



camenta, officiosamque manum vel e longinquo reformidet. Attentione dignum est, nihil magis mucilaginem articulorum destruere atque coagulare, quam acidum tartareum sal lenius v. g. acetum vini, vel vinum rubellum aibum, neque tantam mutationem atque coagulationem ipsi inducere aliud potens, uti oleum vitrioli &c. sicuti id variis experimentis clarissime demonstravit Clopton Havers *l. c. p. 257.* evidenti scilicet documento, vina tartarea aptissima esse ad procurandos paroxysmos arthriticos, ubi tonus glandularum debilitatus est & patiens aliquam ad hunc affectum dispositionem habet.

### §. VIII.

Quamobrem autem tartarea illa nociva sanies potissimum descendat ad articulos & quidem pedum, plures discrepantes afferri possent rationes. Non autem hic illorum quadrat sententia, qui, uti in aliis præter naturam evenientibus faciunt secretionibus sic quoque hanc naturæ beneficio adscribunt, quasi ipsa ex singulari consilio, arbitrio & providentia ad alios morbos avertendos ceu præses corporis heterogeneum dejiciat ad hæc partes. Minus enim benignum est ad sensibilissimas & angustissimas partes ubi maximi cruciatus fiunt emitte peccantem materiam, cum aliæ adsint, ubi non tanta doloris atrocitas metuenda: & magis providentia bonitas & cura dicenda esset, si jam dum ab initio prohiberet, ne tale quid generetur, vel si quid peccet aut error quidam committatur, non statim ille ærumnoso dolore, qui gravissimorum symptomatum parens & causa est, expiaretur; Sed statuendum potius existimo, salia



peregrina in humoribus præter naturam collecta & ex imbecillitate viscerum ac robore virium deficiente non secreta per ordinaria emunctoria, a lymphæ & sero sanguinis ob texturam ejus tenuem porositatēque imbibiatque absorberi, sicque ad tunicas glandulosas totius corporis glandulasque conglomeras ipsæ cum vehiculo lymphæ advehi, modo semper glandularum talis adsit dispositio qua admitti queant. Quare ratio amplius ignota esse non potest, quam ob rem lassitudo, gravitas membrorum, rigor, horripilatio, anxietas præcordialis, phlogoses, oscitatio, æstus corporis cum pulsu celeri, nausea, vomitus præcedant paroxysmos arthriticos & eos comitentur: Item quare ex una in alteram partem vagabunda materia, nisi qualitas ejus renuat, oberret, & per cutis spiracula si ejus evaporatio per aerem frigidum vel repellentia impediatur, intro vergens, diarrhæam, vomitum, colicam palpitationem cordis excitet. Quod autem materia peccans non intra omnes articulos, mediante tunica glandulosa separetur, sed quandoque certis in partibus tantum, uti in chiragra, podagra & ischiatica affectione, id debilitati hujus partis, & tono glandularum destructo adscribendum est: Quod ad pedes descendat, hæc ratio esse videtur, quoniam naturalis harum partium tonus ac vigor multum læditur per frigus, quod pedes magis experiuntur; deinde a calceorum pressione ac strictione frequentius offenduntur. Accedit, quod tardior & lentior per partes extremas & angustissimas, item pedis ob posituram perpendicularem, lymphæ ac humorum sit circulatio ac motus. Unde humorum stases & distensiones præter naturam



ibi frequentiores : Superest adhuc una ratio & quidem præcipua, scilicet quando pedes dolor affligit, cogimur quiescere, ne deterius fiat malum ; quies autem ulterius nocet, cum humores ob motum cessantem, ibi magis tenentur subsistere & imbecillitatem augere. Ita edocemur familiari exemplo, quando pedem diu in uno situ tenemus, vermiculationis sensum oboriri. Vocanda huc quoque est in auxilium, nativa pedum imbecillitas a parentibus podagricis contracta, quæ partim in spirituaſcentia humorum deficiente, & inde resultante partium solidarum maxime extremarum debilitate, vel in ipsa prava textura & conformatione, & pororum dispositione partium harum consistit. Idem obtinet in aliis artubus, quos occupare solet dictus dolor arthriticus.

### §. IX.

Ex hisce adductis facile apparere potest, quid statuendum sit de illorum sententia, qui fermentum quoddam podagricum in articulis stabulari putant, vel membra digestivo suo naturali defraudata esse dicunt in nostro affectu. Unde vero maligni hujus tartarei succi in humoribus proveniat copia, ulterius venit examinandum. Veteres pariter ac recentiores inculpate solent vitia digestionis primæ ac secundæ, ut inde partes solidæ luant suam pœnam. Alii, uti Helmontius & Sydenham solam ventriculi imbecillitatem & coctionem læsam accusant, qua cruditates chyli parum in sanguine correctæ in corporis sphæra ac habitu remanent. Quidam naturæ robur destructum & enervatas vires causam esse asserunt,



runt. Si rem rite expendimus parum hi omnes inter se dissentiunt, modo ante sufficienter explicatum sit, quid per hæc supra dicta intelligatur. Nos spirituaſcentiam ſangvinis & humorum imminutam in cauſa eſſe pronunciamus, quare tam impuræ excrementitiæ ſordes accumulenter in corpore noſtro. Etenim ſubtiliſſimæ partes ſangvinis ſi deficient & ſubjugatæ ſunt, prædonium naſtis terreſtribus, fixis, mucilaginosis, immobilibus partibus, debita ſangvinis motio tam per circulum quam inteſtina ab æquilibrio deſlectit, ſangvinis fit craſſities ac denſitas, calor natus imminuitur, anguſtæ emunctoriorum ac viſcerum viæ obſtipantur, unde non poſſunt non per congrua ſua ſecretoria evacuari ſolita excrementa remorari: quæ ſanitati & vitæ inſidias ſtrunt. Motus enim eſt, qui vitam conſervat, qui elementa ſangvinis intime unit, humores in fluiditate conſervat a putredine & corruptela dum heterogeneas ſeparat, homogeneas defendit & conſervat. Motus autem hic deficit, deficientibus partibus ſubtiliſſimis, mobiliſſimis & admodum diviſis, ſulphureis, æthereis, uno verbo ſpirituosis.

#### §. X.

Unde autem harum particularum defectus repetendus ſit paucis explanabimus. Evenit autem illud ipſum duplici ratione, dum vel quidam immediate ſubducuntur corpori ſpiritus, qui tamen ipſi præeſſe & corpus regere debebant; vel quando variis de cauſis impeditur illorum generatio. Primum autem ſubtrahit ſpiritus & ſubducit nervis ſuum genium immoderata venus. Semen delibatiſſimæ & ſpirituosæ lymphæ ac  
ſan-



sanguinis soboles est, quæ si intemperantius exhaustur, non potest fieri, quin mirifice debilitentur partes fluidæ ratione vigoris subtilitatis & intestinæ motionis; tum & solidæ ratione toni & roboris sui, quibus destruetis, sanguinis etiam circulatio & depuratio non legitimo procedit modo. Unde jam apparet aphorismorum Hippocr. in initio dissertationis nostræ allegatorum veritas, quare nimirum pueri, mulieres & evnuchi non facile patiantur podagram.

Poetis podagra Bacchi & veneris dicitur filia. Hinc antiqui versus

*E solvi lumba venere, solvi lumboque  
Baccho creata est solvi lumba chiragra,*

Et latini Poetæ versus:

*Ut Venus enervat vires, sic copia vini,  
Et tentat gressus debilitatque pedes.*

Notabile autem hic est, quod arthritis & abusu veneris sæpius unice suam originem petat & quod omnes arthritici & podagrici propter sal illud tenerum stimulan in lympa & sanguine contentum ad venerem præ aliis magis sint proclives, adeoque magis magisque enervando vires malum contumacius reddant. Præterea spiritus corporis nostri motores non parum invertit & nervis debilitatem addit vini & maxime genorosi vel etiam tartarei acidi largior potus, utpote partes vini sulphuræ nimis celeriter per venas rapiuntur ad caput subeuntque poros nervorum & spiritibus sese associant, quorum crasin ob cruditatem & heterogeneam indolem suam valde invertunt ut munere suo in regendis machinæ artubus defungi minus recte queant. Ex-



perientia multiplici deprehensum est, nihil plus tartareæ illius, aut quomodocunque appellare libet, materiæ arthritidi generandæ aptæ obtinere quam vinum; quæ etsi in corporibus quibusdam sequesteretur, tamen in illis, quæ viscerum debilitate laborant, servatur atque accumulatur in sanguine. Datur tamen vinorum magna diversitas. Quæ enim in arenosis terris proveniunt, minus materiæ ejusmodi tartareæ continent. Dixit Wepferus *dec. 1. d. 2. 39.* raros apud Schaffhusanos esse podagricos & calculosos, neque convulsivos motus frequentes & potissimum id fieri a vino rubello salubri. Sic etiam memini Jenæ, quamvis ab incolis ejus loci satis liberaliter bibantur vina vernacula, non tamen multos ibi esse podagricos. Contra observatum fuit, quæ in terra pingui argillosa & limosa proveniunt ad fovendam podagram esse paratissima; cuius generis sunt Bohemica, Hungarica Austriaca &c. Neq; obstat, vina magnam quantitatem tartari terræ, qui sæpius vias urinarias magis detergit, possidere, utut in podagra progignenda minoris efficaciæ sint aliis, quæ talem quantitatem non complectuntur, sed forsitan subtiliori ac penetrantiori acido, qui cum succis vitalibus facillimam init copulam instructa sunt. Sic vini Tocaviensis mens. IV. destillatæ vix drachmam semis, totidem autem Rhenani ad minimum drachmas quinque elargiuntur. Multo magis autem talia vina nocent si ad ebrietatem usque ingurgitantur, quo spirituum & vigor naturalis magis extingvitur ut deinde viscerum tono debilitato minus commode illa, quæ in vinis nociva atque pernitiiosa sunt excludi queant. Ulterius genus nervosum valde debilitat, & ad affectum nostrum viam sternit intemperantia affectu-



ctuum. Hi enim immediate pervertendo spirituum  
fchesin & motum naturalem turbas maximas in corpo-  
re ratione mixturæ sanguinis & motus ejus concitare  
apti sunt. Quorsum referre etiam liceat nimias & attentas  
meditationes & haud interruptas curas sollicitudines  
præsertim & studiorum intemperies, in debilibus subje-  
ctis hinc eruditorum etiam morbus est. Hæc enim spi-  
ritus consumunt & necessarias corpori subfurantur vires  
& evocato e ventriculo ad laborantis cerebri subsidium  
igne cruditates accumulunt, quæ obstructions visce-  
rum & hypochondriacam affectionem nec non poda-  
gricam producant.

§. XI.

Postmodum ulterius ad spirituum defectum, torpi-  
diorem sanguinem, ac lympham, cruditatum accumu-  
lationem tribuit nimia intemperantia in edendo seu vo-  
racitas. Quandoquidem cibus nimius præcipue visci-  
dus non facile resolubilis gravis ventriculo est, vires  
premit, in rudem facessit chylum, crudum & crassum  
procreat sanguinem; hinc intemperies, hinc obstructio,  
hinc plethora; quæ vitia gravissimorum morborum  
causæ antecedentes continentesque fiunt. *Hippocrates*  
optime ait ubi cibus p. n. copiosius ingestus est, hic mor-  
bum facit. Proinde uti a multo oleo lucernæ flamma,  
sic a cibo copioso calor suffocatur natus. Præterea  
solitorum exercitiorum intermissio, desidiosa aer cras-  
sus, frigidus, humidus, aquilonius generationi affe-  
ctus nostri valde velificantur, quandoquidem crudum  
& vappescentem reddunt sanguinem, ejus spiritu ascen-  
tiam atque subtilitatem deprimunt, transpirationem &



ventilationem morantur, unde non potest non, quin excrementorum falforum tartareorumq; magna fiat accumulatio. Ex Cratone refert *Sennertus* quam primum intus sudor detinetur aut inhibetur, maxime si consuetus fuerit, imminere paroxysmum podagricum. *Tachenius in tr. de M. principe. c. 72.* tradit excrementum consuetum inter pedum digitos non repertum paroxysmum instantem significare. Habitus autem corporis laxus & spongiosus qualis deprehenditur in sangvineo phlegmaticis ipsisque sanguineis multum facit ad productionem affectus nostri. Etenim sub tali habitu corporis sanguinis circulatio propter languentem tonum solidarum partium & venarū copiam exiguitatemq; lentior & impedior ad proventum cruditatum confert suū symbolum. Referri itidem huc debent inque considerationem venire consuetarum evacuationum suppressiones seu sanguinis seu serii solennes podagræ illis esse consuescunt, quibus sanguis per hæmorrhoides antea expurgari solitus non statim tempore fluit vel si catarrhorum fons qui largiter alias fluxit obstructus. Ex quibus adductis causis remotis expedit colligere, qua ratione intemperantiæ atque pravæ diætæ soboles sit podagra, & quare affectio hypochondriaca nephritica, arthrica magnam inter se alant affinitatem & arctissimo contineantur vinculo.

§. XII.

Quemadmodum autem remota causa sublata tollitur ipse affectus: ita quoq; si spiritualcentia deperdita restituitur, si cruditates humorum & solidarum partium obstructions absumuntur: non tantum mitigatio doloris podagrici sed & plenaria sanatio expectanda est. Quo-  
cir-



circa ante omnia qui podagræ molestissimo dolore detineatur, & mitigationem vel sanationem ejus exoptat primum temperet sibi, quantum possibile est ab usu veneris maxime immoderatæ; & quam corporis languor & dolor subsequitur. Subito namque exhaurit subtiliores spiritus, caput debilitat, mentem ac sensus infirmat atque convellit. Secundo ab ebrietate, copiosa potatione vini & ingurgitatione liquorum inebriantium omni cura & studio sibi temperet, hoc pacto enim multi ab arthritide liberati sunt. *Trincavellus* scribit *de ratione curandi particulares humani corporis affectus* l. 12. c. 17. se novisse medicum Venetiis, qui cum non parum infestaretur a podagra & ad senium usque solum primum atque in quinquennium sibi vinum interdixisset, liber tandem ab omnibus iis molestiis ita evasit, ut amplius usque ad ultimum senium, imo ad mortem horum dolorum fieret expers. Refert *Solenander S. V. cons. 1.* Viduam quandam Hispanam cum usum vini quo tamen pro more gentis paucissimo & dilutissimo usa fuerat omisisset, podagra amplius non fuisse tentatam. Et plures talismodi historiæ notissimæ sunt eorum, qui vel in carcerem conjecti vel ad paupertatem pervenerunt & a vino abstinuerunt ab arthritide liberati sunt. Præstat itaque aquam puram & levem bibere quam vinum. Ex hydropotis enim nemo facile est, qui hunc in morbum prolabitur vid. *Bruyerinus de re cib. lib. 16. c. 3.* *Schenck. obs. 1. 5.* *Hermannus von Heyden, de Podagra Pechlinus obs. p. 226.* At vero quamvis nonnullis podagricis vinum admodum sit infensum, negandum tamen non est, dari casus, ubi ventriculi quædam & intestinorum imbecilli-



tas a frigido humore orta adest, tunc ad virium refecti-  
tionem admitti vinum debere, maxime si diluatur cum  
aqua & vetus excoctum optimæ notæ assumatur, & ad-  
huc magis, si in consuetudinem abiit vini potatio, nec ad  
ejus usum ægrotans protinus sentiat incommodum, de  
qua re consuli potest *Pechlinus obs.* 27.

§. XIII.

Porro qui vitam a podagra immunem servare vel  
ejus dolores lenire atque mitigare intendit: temperet  
sibi ante omnino a multo cibo tam in paroxysmo quam  
extra morbi accessionem. Vere scribit Hippocrates: præ-  
cipuum sanitatis esse studium non satiari cibis & impi-  
grum esse ad laborem. Sique profecto quid est, quod  
vitam servare potest a morbis diuturnis liberam, tem-  
perantia in victu est, hac enim alacritas & ingenio &  
corpori accedit. Consistit autem hæc temperantia in  
hoc, ut vel bis de die parum cibi assumamus nec ple-  
narie satiemus appetitum, vel saltem semel de die & cœ-  
nam intermittamus. Quod mirifice commendat po-  
dagricis *Tackius p. 97. item Sydenhamius p. 579.* qui pran-  
dium saltem commendat, humoribus digerendis cum  
lectus solum sit dicatus. Multi inquit Tackius qui se-  
mel de die solum cibum assumere, ad centum annos vi-  
xerunt. Præcipue autem in paroxysmis a cibo absti-  
nendum est. Nam ejus accessio ipso *Hipp. teste* damno  
est: Eo enim tempore refluunt humores ad cen-  
trum corporis, unde opprimitur anxiamque evadit respi-  
ratio & aliena regio ab impuris succis incurritur. Si ci-  
bum tunc dederis, in impuritatem ille abit ac distento  
hypochoondrio opprimitur pectus, unde anxiam respiratio  
&



& calor cordis major. *Valesius de Taranta in Medicinalibus obs.* refert, quendam, quotiescunque imminere paroxysmum sentiret, ab omni cibo & potu abstinuisse, & ita morbum præcavisse. Facile hinc apparet ratio, quare egeni raro sint podagrici, magis autem opulenti & voluptuosi & qui per multas horas mensis accumbunt & utriculi instar abdomen distendunt. De opulento quodam Germano *Schenkius apud Cass. de Rejes campis elys. q. 79.* tradit, qui cum otio deliciis luxuque circumflueret familiarem huic vitæ podagram, arthritidemque adeo miserabilem contraxerit, ut non nisi duobus suffultus adjunctisque famulis promoveri loco posset, verum lapsis sensim rebus ad paupertatem redactus est tantam, ut & opibus destitueretur & famulis nec nisi frugalis mensa ad vitam suppeteret. Hæc fretus & paculatim ipse solus incedebat & a podagra prorsus deserebatur. Non incommode hinc *Petrarcha*: Si a podagra liberare cupis, aut pauper sis oportet, aut ut pauper vivas. Multos ab hac ægritudine liberasse traditur paupertas, vera defæcatrice corporum; quosdam vero frugalitas, quam voluntariam seu fictam & imaginariam paupertatem dixerim. Vidisti aliquos perpetua vini abstinentia curatos: ita fit dolore dolor clavus clavo pellitur, ut antiquo dicitur proverbio. Vix molestum aliquod sine molestia curatur, ut præterea autem hoc morbo cumque aliis multis pacem habeat, non baccho solum sed & veneri bellum indixisse profuerit. Quare

*Vis te languentem curva relevare podagra*

*Quantumvis fueris dives, egere scias.*

Refert Hieronymus multos fuisse qui cum podagra  
labo-



laborarunt ad paupertatem redactos tantemque liberatos.

§. XIV.

Postremo qui a cruciatibus podagricis liber esse cupit, sibi temperare debet ab omnibus gravioribus curis animi laboribus meditationibus & perturbationibus. Hæc enim elogio Sydenhamii ad dissolvendam spirituum, qui sunt digestionum instrumenta, systasin, ac proinde ad podagræ incrementum multum faciunt. Refert *Porphyrius* in vita *Plotini* quendam Regulum, cum captus esset pedibus sese ab omnibus curis abnegasse & a podagra fuisse liberatum. Tanti refert in hoc morbo vincendo animum quietum habere. Cæterum vero commendandus podagricis est labor ac motus, qui firmitudinem & robur partibus foenerat, transpirationem promovet cruditates dissipat & ad totius corporis habitus immutationem aptissimus est. Elegantissime scribit *Hippocrates* in l. 162. n. *prorhæt.* curari podagricos posse juvenes in quibus nondum sunt facti calli, qui laborem amant, qui vivunt accurate & quorum alvus fluida est. Exercitium autem hoc non nimis sit vehemens sed moderatum quale est equitatio seu frequens vectio in curru, hanc merito cum *Nob. Sydenh.* omnibus aliis corporis motionibus præferimus.

§. XV.

Statutam hanc vivendi rationem si quis accurate tenere animum sumit, certe videbit tam efficax auxilium atque levamen quale a nullo medicamento expectari potest. Quoniam autem pauci reperiuntur, qui talismodi legibus se adstringi patiuntur in procinctu



Et ratio est quare tam difficilis sanationis sit ipsa podagra. In principio ut plurimum solet negligi, nemo vult vexari podagra, accusant modo calceamenta, modo aliquod aliud impedimentum, ita ut vix quisque sibi persuadere possit, se habere podagram. Accedit etiam, quod a consveta vivendi ratione voluptatibus, ad quas natura ratione sanguinei temperamenti inclinant, non velint penitus, quamvis forsan ad tempus, si dolores urgent, abstinere, sed licentiose semper vivant, adeoque cum prima in herba facillime jugulari podagra queat, neglecta autem ferocior & pertinacior evadit, donec crebrioribus paroxysmis se invicem excipientibus sanguinis massa graviolem sibi contrahat discrasiam & immedicabilem vappescentiam, ut, concurrente simul dispositione hereditaria, facile in tophaceam & consummatam degeneret, de qua Poeta canit.

*Solvere nodosam nescit Medicina Podagram.*

Ratio quare paroxysmi podagrici tam longum tempus sæpe infestent dolore suo hæc est: profundius latitat materia vitiosa intra ipsas membranas ac ligamenta articularum, quæ angustissimos poros habent, & ex arctissime connexis fibris contexta sunt, unde materiæ vitiosa correctio & evaporatio in partibus talismodi frigidis & tensis lentissimo procedit gradu.

#### §. XVI.

Verno tempore facilius curatur item ætate juvenili, quia ob majorem ætheris motum transpiratio sanguinisque divisio ac spirituscentia intensior est, & hinc etiam tunc temporis, uti etiam in æstate multo mitior esse solet. Hyeme autem adventante, quoniam debita humorum per poros eliminatio pro voto non



succedit & spirituum robur fractum, necesse est, ut ingens materiæ indigestæ colluvies accumuletur, in paroxysmos facile prorumpens si propius accedat sol nostro horizonti, unde hyems solet esse faber podagræ, verum autem paroxysmorum productor: adeoque ex hisce patet, quare cura hyberno tempore difficilior procedat & longiores maneant paroxysmi.

§. XVII.

Hisce deductis operæ pretium esse existimo paucis iudicium nostrum interponere de methodo hactenus usitata sanandi dolores podagricos. Plures & ex iis exercitatissimi practici vomitoriorum usum non satis dilaudare queunt in affectu hoc tam præservando quam sanando. Confert, ut podagrici omni verno & autumnali tempore circa æquinoclia præservationis loco assumant vomitorium. In principio quoque podagræ proficuum esse ipsi *Galenici* jamdudum testati sunt. *Dolæus Encycl. Med. p. 635. Hildanus cent. 6. obs 34. Mercatus de Morbis internis l. 4. c. 18. River. praxi l. 6. c. 1. Sylv. pr. p. 153.* emeticorum usum præsentissimum judicant. Alii magni faciunt præservationis causa laxantia ante ipsum paroxysmum vel singulis mensibus. *Doctissimus Solenander in cons. p. 78.* scribit se in paroxysmi principio solere exhibere magno cum successu aliquod purgans primum id edoctum ab *Alex. Tralliano l. 11.* licet a multis hoc tempore reformidetur. Singulare esse scribit *eruditissimus Pechalinus obs. 26.* quod arthritici leviores plerumque experiantur insultum detracta ex primis visis materia. Novi autem empiricum qui Medicamento chymico seu crysalli lunæ essent seu martis aliquod vitriolum etiam in inveterato jam morbo postquam



quam biduo ante paregoricum dedisset, alvum magno cum fructu provocabat. Ex adverso Sydenhamius illorum usum penitus rejicit. Nostra sententia hæc est, qui plenius vescuntur & largiori victui assueti sunt & moxante paroxysmum primum invitante appetitu plus justo indulserunt gulæ, appropriata cathartica vel emetica summo cum fructu atque emolumento assumere possunt. Depletis enim sic primis viis a copiosa saburra humorum biliosorum & acidi exsuperantis, leviores evadunt paroxysmi, nec tam molesta symptomata anxietates dolores patiuntur ægri. Eadem ratione, qui non temperanter vivunt, sed copioso cibo ventriculum premunt, opus habent, sæpius repetere usum purgantium vel emeticorum, ut cruditatum accumulatio præpediatur. In eandem sententiam nobiscum accedit Lister tract. *de Arthrit.* 258. qui ita loquitur: unice illa aurea regula de abstinence mihi certe, nescio an podagricis aridet, nempe ut iis quibus aut integra sanitas, aut longiora valetudinis bonæ intervalla cordi sunt, parva cibatio summæ curæ sit. Atque hoc omnibus hominibus, quocunque statu & conditione sint, cum ipsius quoque exercitii loco esse potest etiam pedibus ex toto captis. Qui tamen plenius vescuntur illos catarctica appropriata aut emetica interdum sumere necesse est.

§. XVIII.

Venæsectionem in paroxysmo nonnulli in frequenti solent habere usu, quæ tamen non potest proficere, nisi ubi dolorum ferocia & major inflammatio propter impeditiorem sanguinis in parte affecta circulationem metuenda. Hæc enim maxime in arthritide calida & vaga, ætate juvenili & ubi sanguis exsuperat



magnum curæ atque dolorum præstat compendium. Ad avertendos paroxysmos satius esse existimo ipsa abstinere, sed præstat motu & abstinencia imminuere superfluum sanguinis serum & cruditates in venis digerere atque subigere. Sanguinis enim emissionem non tantum copiosum serum idque tartareum sed & portio bona sulphurea, quæ servanda erat, exhauritur. Quod podagræ medelam per lactis usum attinet, hoc tam antiquitus, quam etiam hodierno tempore ceu certissimum præsidium ad expugnandam arthritidem commendatur, de quo legi merentur *Misc. nat. curios. dec. 1. a. 6. 7. dec. a. 2. p. 3. dec. 1. a. 1. ob. 141.* Sennert. de febribus *l. 3. c. 3. p. 359.* Waldschmied diff. de cura lactis. Pechlinus *obs. 23.* Judicium autem nostrum de cura podagræ per lac hoc facimus: non omnibus promiscue convenit lactis usus nec bene succedit talis cura, quando nimirum corpus adest plethoricum, pituitosum, ventriculus & vasa colluvie viscidorum acido tartareorum humorum sunt obfessa, visceraque obstructa, in iis sane lactis diuturniorem diætam male cessisse & viscerum infractus dispositionem ad cachexiam hydropem, abscessus, inflammationes internas excitasse non semel a nobis cum aliis fuit observatum. Quod si autem subiectum est macilentum, corpus est perspirabile, humores falsos calidosque fovet, uti id accidit in arthritide biliola, volatili, efficacissimum esse lactis remedium emendando & elixivando salis tenui aptum non ibo inficias. Semper tamen primum ventriculi vires explorandæ sunt, & videntum, an ferre possit illud & par sit vincendæ coagulationi lactis, quæ in ventriculo nunquam non solet contingere. Multum autem refert, quem in modum lacte utamur.



mur. Optimum est, si calide sorbilletur & ad dimidium mixtura veronicæ, chamædryos, agrimonix diluatur, quo pacto obstructions & periculosum coagulatum quod lacticinia minantur, averti possunt. Accedit, quod hac ratione lac dilutum absorbendis & eluendis salium particulis propter tenuiorem aquæ texturam porositateque magis accommodatum sit quam crassa illa & fibrosa lactis substantia.

### §. XIX.

De diaphoreticis in quorum usu magnam spem collocare solent practici hoc monendum censemus, ne in usum vocentur fortia salina oleosa, quæ sæpius majorem motum ac turbas ciendo ardorem dolorem non parum adaugere observata fuerunt, maxime in subjectis calidioribus & ubi ad volatilitatem sal morbosum inclinat. Quoniam autem cutis congruum & universale peregrinorum salium existit emunctorium, non sine ratione commendantur illa, quæ circulum sanguinis & perspirationem corporis atque humorum subtilisationem promonent, cutisque spiracula servant aperta: quo nomine præter potus aquæ calidos correctos aut herba chamædreos seu specifica a veteribus mirum æstimata, radice chinæ vel sassafr. hermodactylis, herba betonicæ (qui partim per diuresin partim per diaphoresin diluta salia sanguinis secernunt,) motus atque exercitatio corporis commendatissima est, addimus & ipsam abstinentioniam tenuemque ac modicum victum, quibus corpus multum perspirabile humoresque tenues redduntur.

### §. XX.

Quoad topica, hæc parum fida & secuta pronunciamus quoniam propter tonum & sensum cutis variantem pro-



diversitate individuorum contrarium sæpe & præposterum producunt effectum, adeo quod huic auxilio fuit, alteri detrimentum efficiat materiam vel repellendo vel graviores dolores efficiendo. Securissimum itaq; est, nisi bene naturam morbi & partis affectæ an medicamenta ferre queat, perspectam habeamus, saltem quiete atque in temperato calore partem dolentem servare atque fovere.

§. XXI.

Hæc sunt quæ de affectus hujus truculenti sanatione in medium proferre placuit. Unicam commendavimus vitæ & sanitatis conservatricem virtutem humano generi commendatissimam, temperantiam vitæque sobrietatem quæ omne ferme punctum absolvere potest tam intentione præservatoria quam curatoria, quandoquidem ab intemperantia & præpostera vivendi ratione si nativam debilitatem exceperis, unice natales suos petere nostrum affectum in dissertatione fusius deduximus. Equidem persuasissimum habeo, paucos fore contentos hac deductione, partim quoniam ipsis non arridebit accurata talis vivendi ratio, sed malunt licentiose & in omni luxu vivere, sustinere dolores, anhelantes saltem talem medicinam, qua cum morbo in gratiam redire queant salva sua voluptate. Alii dubitabunt de veritate assertionis nostræ, propterea quia secundum strictas diætæ regulas vixerunt nec tamen mitigationem doloris experti sunt. Hisce autem respondemus, non saltem in uno & per certum tempus sed in omnibus, si vehementia affectus id exigit & per sufficiens tempus servari has leges debere, ut tota natura sese recolligat, & vincende morbo par evadat. Multi sunt, qui ad tempus bene vivunt, simul ac autem paulatim resurgit naturæ vis, pro-

tinus



tinus naturali inclinatione invitante, & consuetudine alliciente miscent voluptates atque intemperantiam. Et quando non statim experiuntur singulare a mutatione diætæ & temperantia emolumentum: fiunt impatientes & prolabuntur in consuetum vitæ genus & hæc jam ratio est, quare tam difficili negotio sanescat hic morbus. Si qui autem sunt qui in omnibus ex præscripto vivunt & sanitatem difficulter recuperant; illi cogitent, naturæ vim penitus esse fractam & tantam humorum malitiam, quæ in ordinem vix redigitur, conspirante simul hæreditaria dispositione, morbi diuturnitate ipsaque senectute. Valim tamen perpendant, nisi sic viverent, majora & sæviora symptomata etiam non citra vitæ periculum, ut incurrant metum fore. Nec autem quis putet amplissimum pharmaceuticum fontem tanta sterilitate laborare ut ex ipso non possit peti unum efficax remediū. Commendabo hinc instar omnium duo remedia magnæ præstantiæ atque virtutis ab Exc. Dn. Præside mihi communicata. Primum autem est liquor quidam antispasmodico diaphoreticus, qui tam externe, quam interne commodissime tempore paroxysmi adhibere potest nec non ad ipsam præservationem. Modus parandi hic est. Rec. Spir. Sal. Ammon. vinos. Unc. iij. Extract. castor. drach. ij. Succin Unc. sem. Opii, Croc. ana drach. j. Camph. drach. sem. Hæc omnia accurate mixta in digestionem resolve, sic evadit liquor saturatus cujus dosis est gut. 40. 50. 60. Sal volatile salis ammoniaci in hoc medicamento cum particulis paregoricis & tenuissimo evaporabili Sulphure castorei opii croci camphoræ intime nuptum ac mixtum est. Unde intimioris admissionis penetrat totius corporis poros & acidum stimulans corrigit, mitigat, inviscat,



tumultus spirituum sedat, nervosque singulari virtute solatur ac roborat. Adhiberi potest in principio paroxysmi, quando adsunt insignes anxietates, dolores aliaque infensa symptomata & materia renuit extraverti. Idem remedium si ullum est; quod extrinsecus spasmum partis affectæ tollit, dolorificas tensiones sistit & stagnantem materiam corrigit, correctam ad evaporationem disponit, certe liquor hic est quem raro partes ex idiosyncrasia seu speciali textura sua reformidant. Alterum remedium, quod extra paroxysmum adhibendum est mercuriale auri connubio nobilitatum & diaphoreticum est. Nihil magis aptum est potentissime obstructions veteres in emunctoriis vel angustissimis glandulis consistentes solvere atque expedire, quam mercurius, qui minerali suo spiritu æthereo tenuissimo partim & specifica gravitate sua sphæram corporis pervolat & humores in motum concitat. Quam rebelles morbi salivatione mercuriali depulsari queant, res in foro medico est notissima, hæc enim & hic utilis & multis experimentis corroborata. Latius de hac re videri meretur Kerkringius in *spicil. obs.* 28. Sylvius in *praxi* p. 174. Rolfincius *ordine & methodo speciali* l. 6. Sect. 3. cap. 1. Wedelius *de Medicam. facult.* l. 2. Sect. 2. cap. 12. Quoniam autem mercurius vehementissimum remedium nec omnibus individuis proficuum atque accommodatum, præstat depuratissimum cum auro, quod ejus pernitiæ vim singulari modo cicurare idoneum est, conjugere atque debito ignis temperamento tractare, ut fixam quodammodo acquirat naturam & purgantem atq; emeticam suam vim exuat. Tali methodo vidit Exc. DN. PRÆSES aliquot desperatos podagricos & hic Halæ Saxonum, virum qui per 12. annos contractura laboravit ex podagra sanitati restitutos ut ambulare & officio suo per aliquot annos fungi potuerint. Sed de remedio hoc & ejus usu forsan DEUS alio tempore tractandi dabit occasionem.